

Dieu nu paja ils cuosts dal s-chodamaint

A Silvester haja dat illa baselgia refuormada a Sta. Maria l'ultim cult divin fin in avrigl 2025. La baselgia nu vain nemp per motivs economic ed ecologic plü s-chodada d'urant ils mais d'inviern – e fin là daja predgias evangelicas illa baselgia a Valchava. Tenor la Baselgia chantunala evangelica dal Grischun nu's tratta pro Sta. Maria da l'unica baselgia cun quel destin e la dumonda da s-chodar baselgias occupa tuot las raspadas evangelicas i'l chantun.

MARTIN CAMICHEL/FMR

Cun lur müraglia da crappa da plüs tschientiners e sainza dretta izolaziun nu sun baselgias d'urant l'inviern giust lö pruvats. E causa las prescripziuns da la Chüra da monumaints esa quasi impussibel da proteger ils bains culturals cun ün'isolaziun moderna e perdürabla. Be grazcha als s-chodamaints pelplü electric as riva da ragiundscher üna temperatura tant inavang agreabla illas chasas da Dieu d'urant las pacas uras da la predgia.

A Silvester nun es il s-chodamaint da la baselgia refuormada a Sta. Maria be gnü activà per l'ultima jada d'urant l'on, dimpersè per l'ultima jada insomma fin in avrigl 2025. La baselgia nu vain nemp plü s-chodada fin davo Pasqua, e perquai nun han fin in trais mais neir na plü lö predgias a Sta. Maria.

Motivs economic ed ecologic

«La baselgia refuormada a Sta. Maria es la plü gronda cha nus vain, e da s-chodar quella d'inviern douvra la plü blera forza. L'idea es uossa da spargnar forza in möd economic ed ecologic», declera *Chasper Stuppan*, il president da la raspada evangelica da la Val Müstair. El agiundscha cha da Nadal fin a Silvester d'eira la plü blera gleiud da tuot l'on illa regiun e cha a partir dad uossa vegna vieplü quiet illa val. Perquai s'haja amo gestiunà la baselgia a Sta. Maria fin la fin da l'on passà.

Chi chi vuol uossa ir fin in avrigl 2025 ad üna predgia evangelica illa Val Müstair, po far quai illa baselgia refuormada a Valchava. Implü daja eir üna o duos jadas al mais ün cult divin a Lü. Tenor *Chasper Stuppan* nun esa neir ün

gün problem per la gleiud da visitar d'urant ils trais mais ils cults divins a Valchava, illa fraeziun vaschina da Sta. Maria, e cha la raspada haja gronda inleteria per quist pass.

Ün ulteriur avantag

«S-chodar tuot nossas baselgias cun electricità es minch'on ün sforz finanziar.

«La baselgia refuormada a Sta. Maria es la plü gronda cha nus vain, e da s-chodar quella d'inviern douvra la plü blera forza. L'idea es uossa da spargnar forza in möd economic ed ecologic.»

Chasper Stuppan, president da la raspada evangelica da la Val Müstair

Nus vain vis cha nus vain da far alch e noss mezs finanziarials van eir adüna al main», uscha *Chasper Stuppan*.

La baselgia a Sta. Maria resta però inavang averta e po gnir visitada, be ch'ella nu vain apunta plü s-chodada. Quai ha però tenor *Chasper Stuppan* eir ün ulteriur avantag, nemp cha l'orgel da basel-



Per motivs economic ed ecologic nu vain la baselgia refuormada a Sta. Maria plü s-chodada tanter Silvester 2024 ed avrigl 2025. FOTO XENOS CC BY-SA 3.0

gia nu vegna plü uschè strapatschà causa ils müdamaints da temperatura chi da cun s-chodar.

Ün tema in tuot il chantun Grischun

Dons causa il s-chodar d'urant l'inviern sun nemp ün problem central ed implü per baselgias: «Il problem in general in baselgias – sco eir ils dons – daja pervi da las differenzas da l'umidità causa il s-chodar. Quai vala per l'orgel da baselgia, ma impustüt eir per affrais-chs», declera *Marcel Schädler*, il manader da finanzas ed infrastruttura sco eir cusgliader d'ambaint eclesiastic pro la Baselgia evangelica chantunala. El accentuescha cha la proteziun d'orgels da baselgia e da bains culturals saja da grondschima importanta per la Baselgia evangelica chantunala. Uschea cha na be la raspada evangelica da la Val Müstair es confrontada cun las diversas sfidas in connex cun s-chodar las baselgias d'urant l'inviern, dimpersè tuot las raspadas i'l chantun.

L'efficazia d'energia

«Il s-chodar d'urant l'inviern es propa üna gronda dumonda dals prossims ons. I va per la tematica da l'efficazia d'energia e nus eschan pel mumaint cun nos fisiker da construziun vi dad invar divers progets per pudair optimar il s-chodar d'urant ils mais plü fraids», disch *Marcel Schädler*.

Tenor el nu vegnan fingià uossa numerus da las totalmaing var 180 baselgias refuormadas in Grischun plü s-chodadas o perquai serradas d'urant l'inviern causa motivs d'energia o causa la naiv. Cifras concretas nun ha el però pudü nomnar. I's lös pertocas as prouva fingià uossa da centralisar ils cults divins e da spordscher quels in baselgias bain accessiblas. «Uossa escha vi dad evaluar ils resultat da nossas retscherchas. Che chid' es però fingià uossa evident es, ch'in futur nu pudarana plü s-chodar tuot las baselgias sco fin qua», disch *Marcel Schädler* ed agiundscha: «Uossa as tratta dad optimar tuot l'istorgia, cul böt da pudair evaluar ün concept perdürabel pel futur.»

Sculptura chi admonischa e fa spranza

Cristina Waldburger chi viva a Sent ha creà üna sculptura da lain chi renda attent al sfrüttamaint da la terra cul giavüsch d'avair chüra da quella. La sculptura as rechatta illa baselgia San Geer a Scuol ed es gnüda preschantada cun ün cult divin in dumengia passada.

NICOLÒ BASS/PL

Or persunas s'han chattadas sün ün muot. Ellas derivan da differentas regiuns dal muond e rapreschaintan ils differentes pövels. Ellas as dan il man e guardan in üna gronda foura illa terra. Forsa cha la mamma da la terra – il Dieu Gaia – as lascha dudir. Tuot in üna jada as doda ün tun. Las ot persunas dodan e resaintan il mal da la mamma da la terra: Dapertuot regna guerra e displaschair. La società ha pers il respet da la vita e sfrüta la natüra sainza scrupels. Tuot va in malura. Gaia giavüsch da plü pisser, cumpaschiun ed amur per tuot la vita sün terra.

Preschantà la sculptura da lain

Cun quist'istorgia aint il cheu ha s-chafà *Cristina Waldburger*, chi viva daspö trais ons a Sent, üna sculptura da lain raudoonda cullas ot persunas chi's tegnan il man e guardan illa foura per comunicar culla mamma da la terra. Quista sculptura as rechatta illa baselgia refuormada San Geer a Scuol ed es gnüda preschantada d'urant il cult divin in dumengia passada in preschentscha da l'artista. *Cristina Waldburger* ha preschantà l'istorgia intuorn sia sculptura

cul giavüsch da benedicziun e glüm per tuot il muond.

Avair chüra da la terra

La decleraziun e la simbolica da quista sculptura da lain sun stattas in dumengia passada la tematica principala da tuot la predgia. Eir la ravarenda *Dagmar Bertram* s'ha referida a la sculptura ed impustüt a la simbolica da l'ouvra da lain. «La terra viva eir sainza nus, nus però brich», sun stats eir plecs e cul psalm 104 es gnü lodà il Creatur: «El fa chi priia erba pel muvel, verdüra a pro dals crastians. El fa cha la terra prodüa vivanda, e vin chi allegra il cour da l'uman.» Per la ravarenda da Scuol esa important da repeter ils plecs per nun invlidar: «Nus resgiain vi dal rom, ingio cha nus sezzain lasura.» Cha perquai saja important d'avair chüra da la terra. Cha la sculptura illa baselgia San Geer a Scuol dessa bainischi admonir e render attent als fats, però eir derasar la spranza cha l'umanità chatta la sporta e piglia ünsacura serius la lezcha d'avair chüra da la terra, ha declerà l'artista *Cristina Waldburger* da Sent. Ella vezza sia sculptura eir sco ün spejel per la società. E chi chi vuol verer in quist spejel, po far quai eir in avegnir illa baselgia San Geer a Scuol.



Cristina Waldburger observa sia sculptura chi admonischa d'avair chüra da la terra. FOTO NICOLÒ BASS